

vnd halt das Instrument daran / vnd ruck es herumb bis
das Magnetzünglin auff dem puncten oder grad 24. innstahet/
vnd zeuch widerumb ein Lini / vnd setz den Circel auff die
102. puncten auff dem Maßstab / (dieweyl von dem b. zu
dem c. 102. Ruten ist / setz den einen Fuß des Circels in das
b. vnd mach mit dem anderen theil ein puncten auff die ge-
zogene Lini / vnd verzeichne ihn mit dem Buchstaben e.

Also ruck das Instrument auff jeden puncten oder grad /
wie es in dem Fald ist gemerckt worden / bis du alle Linien auff
das Papeir gezogen hast / vnd mit den Buchstaben verzeichnet /
so wirst du die rächte wahre Proportion des Faldlagers auff-
gerissen finden.

Wilt du auch wissen welches gegen Auffgang / oder
Nidergang gelegen sey / so thu ihm also / nimb das Instru-
ment vnd leg es auff die mitte des auffgerissnen Papeirs vnd
ruck es herumb bis es in der mittag Lini innstahet / so zettich ein
Lini der Regel nach hinaus / als dann zeuch noch ein Creuzlini /
vnd verzeichne darzu den Auffgang / Nidergang / Mittag
vnd Mienacht / so kanst du sehen wie jedes orth gelegen ist.

Demnach wils günstiger vnd kunstliebender Läser so du
ein Landschafft von 5. oder 8. Meylwägs groß woltest in den
grund auffreissen vnd verstücken / so müst du von einem Ort
zu dem anderen was du abgesehen hast / nachfrag haben den
Stunden vnd Meylen nach / wie weit von einem Schloß /

Dorff oder Hof sein mag / das sol dann jedes mit seinem

Nammen auffgeschriben werden / wie dann

in dem vorgenden Capitel ist ge-
lehrt worden.



Das